

Homenahe precioso na Belen Kock-Marchena, como apertura di Luna Cultural di Biblioteca Nacional



ORANJESTAD (AAN) -- Apertura di e luna cultural di Biblioteca Nacional a tuma lugar diahuebs anochi, cu un homenahe na e conocido dama poeta y juffrouw di school, señora Belen Kock-Marchena.

Tabata presente Ministro Mary Wever-Lacle, titular di Enseñanza y Labor, presidente di Parlamento señor Marco Christians, señor Padu Lampe, señora Filomena Wong, y e grupo musical cu semper ta compañía Belen ora e ta declama su poesianan, integra pa, entre otro, Lydia Emerencia, Franklin Granadillo, Elbert Bernabella, Edwin Kock y Tino Ruiz.

A worde presenta un bunita video "E herencia", produci pa servicio audio-visual di Biblioteca Nacional, cu ta refleha diferente etapa di e vida di e poeta, y cu a ser presenta pa prome biaha dia cu Belen a batiza su ultimo coleccion "Den bena di vida" y su CD "Alimento pa Alma", na Cas di Cultura.

Den e anochi ameno aki por a scucha e voz di Padu Lampe, interpretando den forma di canto un poesia di Belen, cual el e pone den ritmo di bolero y cu ta forma parti di un produccion di Padu.

Tabata impresionante di wak Padu balia cu Belen na ritmo di e bunita pieza aki.

Maestro di ceremonia tabata

Ruben Garcia, ken no a perde oportunidad di haci su jokenan dunando e anochi su toke humoristico tambe. El a ricibi por cierto, un retrato cu Padu Lampe a pinta pe, como reconocimiento na su añanan promoviendo farandula y fungiendo como maestro di ceremonia.

E lobby di Biblioteca tabata completamente yen, te hasta a bira demasiado chiquito pa e cantidad asina grandi di invitadonan.

Un momento masha agradable tabata ora cu Ruben Garcia a lesa fax y e-mailnan cu Belen a haya for di su yunan na Hulanda, cu palabranan cu tambe ta muestra e "bena di inspiracion" cu nan a hereda di nan mama.

Ora yunan ta muestra con orguyoso nan ta di nan mayor nan, ta algo sigur conmovedor, y cu den e caso aki a trece emocion cerca e publico presente. Aplauso- nan cariñoso tabata testimonio di esey.



E conocido artista plastico Alida Martinez a skirbi un poema dedica na Belen, ken e ta admira hopi, cual a worde declama pa Rutty Vrieswijk, ken tambe di su parti a dedica palabranan bunita na Belen. Sra.Kock-Marchena mes a haci su entrada riba escenario cu su poesia "Awa ta Yobe" na prome instante interpreta den forma di baile pa varios mucha.

Zuster Juliette, a hiba un discurso chiquito pero profundo dedica na Belen.

Otro momento emotibo



tabata ora cu Belen a entrega un plaquette na su amiga y motor tras di su exito riba tereno literario sra.Philomena Wong.

Philomena a expresa su gradicimento tambe na tur persona cu a haci oracion pe na momento cu el a confronta cu problema di salud, y hasta el a bisa cu di parti di Belen

ta oracion den forma poetico a yega cerca Dios.

A cera e anochi, despues di varios presentacion bunita, cu declamacion di Belen mes, acompaña pa baile door di Diane Antonette.

Tabata tin hopi mas den e anochi sublime aki, pesey e articulo aki ta solamente un resumen di tur loke a bin dilanti.